



Minggu, 03 Nopember 2024

Ogen: Maleaki 1:9-14



Mekarus Man Tuhan



Engkai maka lit persembahen si la ialoken Tuhan? Rayo-ayo nge Tuhan e natap persembahen si ibereken anak-anakNa man baNa?

Persembahen imam-imam si erdahin i bas Rumah Pertoton, ciga ate Tuhan. Sabap ipersembahkenna pangan man Tuhan si kin ia jine pe ciga atena. Ipersembahkenna man Tuhan asuh-asuhen si itangkona, bage pe asuh-asuhen si cacat. Labo si ipersembahkenna e ngenca ciga ate Tuhan tapi perbahanenna, mekarus man Tuhan, em si la payo akap Tuhan. Jadi, sendalanan nge, kai si ipersembahken ras uga sikap i bas nehken persembahen e.

Kalak si mekarus i bas nehken persembahen, tandana la mehamat man Tuhan. Me bujur nge la aloken Tuhan persembahen kalak si mekarus man baNa? Bandingkan Kain ras Abil i bas nehken persembahen. Isingetken maka Abil isikapkenna si mehulina, anak biri-biri sintua, si mejilena. Alu pusuh si ersikap nehken persembahen, iberekenna si mejilena, em si ngena ate Tuhan. Labo jumlah rikutken perkiran duit si ialoken Tuhan tapi pusuh si ersikap. Persembahen Kain la ialoken Tuhan erkiteken la teridah persikapen pusuhna ndahi Tuhan. Lit kesan gelah enggo, me bage kin ikataken mekarus? Persembahen Imam la ialoken Tuhan, persembahen Kain pe la ialoken Tuhan. E jadi dalanta erlarjar uga sikap si mehulina i bas ersembah. Ula mekarus e ertina, sikapken rumah nari persembahennta, rikut ras jumlahna, siarihken ras sitotoken. Adi kita pe labo si akap mehuli, pangan si ciga ateta la gunana iendesken ku rumah Tuhan. Iidah Tuhan nge pusuh kalak si ersembah man baNa ras ilakokenNa rikut siniakapNa payo.

➤ Perlu pusuh si ersikap i bas nehken persembahen